



Selasa, 19 Mei 2021
Ogen: Kuan-Kuanen 17:27



Saber Ulu Kepentaren



Ibas jaman teknologi maju ras perkembangan media social gundari enda, erbahanca manusia si gundari lanai mbiar mbiar ngerana bagepe ncidahken ukurna. Tapina mbue netijen-netijen si gundari e, memanfaatkan media social enda alu la pentar. Sebab megati siidah bahasa-bahasa si la pantas nge siban i bas erbahan status bagepe komentarta, janah mbue komentar e itulis i bas keadaan emosi. Padahal pengerananta ntah pe sindarat bas babah ras siteridah arah tulisenta em ncidahken seh uga kualitasta. Tapi la terjeng je saja, kebeluhen ncibalken ranan e, bas ingin, cara ras paksa si payo encidahken maka lit kepentaren i bas kita.

Kalak si beluh rukur iangkarna ngerana, ertina kalak pentar labo boros kata-kata. Labo pedasen ia ngerana asa megi-megi. Kenca ipernenna ras ipahamina kai masalah emaka ngerana ia, emaka kalak si bage biasana labo mbue kata-katana, tapi tep-tep kata si ibelaskenna tepat ras mereken ngaruh si positif.

Kalak si saber ukurna ia kap kalak si pentar. Kalak si saber em kalak si nilahken perubaten, sijabapen ras sialo-alon, sebab e kerina erbahan murde ras turah perpecahen. Kalak saber e jadi erkiteken proses ras latihan. Pas bagi kupu-kupu er-*metamorfosis*. Kupu-kupu e jadi arah nipe-nipe (bernga) kitik si la merupa, itempa ia gelah igulung ibas kepompong, janah kenca nggo seh masana arus ka ia berjuang ndarat arah kepompong e, emaka kenca ndarat nggo lit perubahen bas dagingna.

Bage me pe kita. Kesabaren e salah sada pemere Dibata si arus kepe siasah, si petelap alu perjuangenta ngkuasai diri ras dilah. Erlajar menahan diri ras nggeluh bas perenungen si mbages kerna kata Dibata tep-tep wari banci membentuk karakter saber si ulihna eme kepentaren si meherga akap manusia ras Dibata.